

**Kálag echě elónténé ébε echě
Paalε áténlé
Baá Kōrinto
N̄dibned n̄ kálag**

Enén kálag chó edé kálag echě elónténé ébε, echě Paalε áténlé bad bé dyad á Kōrinto áde ábédé á Masēdonia. Paalε antēl chó á pónde echě mam méekage'aá bōbε mwembé n̄me n̄bédé á Kōrinto. Bad behóg áf̄intē e n̄mē mwembé bēnhōb Paalε mekan mé mbéb á yāl, boŋ kénē Paalε anwōŋ n̄lēm bwāmbwam aá bōb̄bō bētīm ásē. Ade bēntimmé-'ε ásē, Paalε anwóg menyīŋge bwāmbwam. A kálag-tē wén, Paalε ahóbé ngáne bōbε bad bé mwembé bé Kōrinto bēmbēē. Awēd-te ahóbé nzōm echě ekáá boŋ átelé' enén kálag ne e'yale ábe é'wúú áte t̄ŋŋene nzyāŋ éche ákúdé ne atyéemēn áde baahóg áf̄intē e mwembé bētyéemánnáá mó. Alúmté-'ε n̄mē menyīŋge ngáne nyaa echě átélé enén kálag, ébélé bad bētédte Abel dé mbéb boŋ bōb̄bō bētīm-me ásē. Acháa-'ε mwembé aá bésaa mōné ne n̄lēm nhóg áwōŋŋen betóótōkē bé bad bé Kr̄isto ábe bēbédé á mbwóg e Judeya. A kálag-tē wē ámpē, Paalε ahóbe mekan álúmed aá móbēdē mbapεε a n̄lomag a mbále awē Yesu Kr̄istā. Ambel n̄n áyāle nguse é bad ébédé á Kōrinto échě ēnchag yāl bán bem-bapεε bé n̄lomag bé mbále ábe Kr̄istā, bán Paalε-'ε adé mbapεε a n̄lomag a metóm.

Nkabtéd n̄ kálag

N̄dibned n̄ kálag 1.1-11

Paale ne mwembé ní dyad á Kōrinto 1.12-7.16
 Asaṅned bad bé Krīsto á mbwóg e Judeya mōné
 8.1-9.15
 Paale mbapεε a nlómag a mbále awě Krīstəə
 10.1-13.10
 Melenten mé asóg 13.11-13

¹ Mε Paale, mbapεε a nlómag awě Yesu Krīstəə ngáne Dyöb átíídé, mε-εé ntelé enén kálag. Mε ne awed mwānyaṅ a Krīsto, Timotiε, sélomme' nyé elad e bad bé Dyöb ábe bédé á dyad á Kōrinto ne bad bé Dyöb bésyāāl ábe bédé á mbwóg e Akaya, melenten. ² Nsimé ne nsaṅ ní Dyöb Titée awêd ne Sāṅgú Yesu Krīstəə, míbê ne nyé.

Dyöb áwéde' moosyāal nlém á abum

³ Syánē déken Dyöb, Sáá awě awed Sāṅgwéé, Yesu Krīstəə. Mó adé Titée awě awóge moosyāal ngəl, abé-'ε Dyöb áde áwéde' moosyāal nlém á abum. ⁴ Awéde' syánē nlém á abum áyāle ndutul ésyāal eche dékudεé, ábel boṅ syánē ámpē déhel bad nlém awéd á abum ábe bómpē békude nyaa e ndutul ké ehéé. Déwêd bó nlém á abum melemlem ngáne Dyöb áwédeé syánē nlém á abum. ⁵ Ngáne Krīstəə ákúdé'áá metake, néε syánē ámpē dékudεé metake áyāl echê. Né-ᵓó, abé áde dédíí ne Yesu Krīstəə, Dyöb déwêd syánē ámpē nlém á abum bwāmbwam. ⁶ Nzé sékude metake édíi áwéd nyé nlém á abum ne áwóngεn nyé ákud e soóson. Nzé sékudé e'wéd bé nlém á abum né nyémpē nyéékúd e'wéd bé nlém á abum, nyéékúd-te ngíne áwεsen melemlem mé metake ne e'kaṅ bé nlém ngáne sémpē séwéséné. ⁷ Sêsumé nlém áwēn bwāmbwam. Sébíí nén bán nzé nyékude' metake

melemlem ngáne sémpē sékudεέ, Dyōb déwēd nyé nlem á abum melemlem ngáne áwédé-'ε sé.

⁸ A-baányan, sēdāó bán nyésōnten nyaa e metake echē sékúdé á mbwóg e Esia. Metake míme sēnkudté mēndenléd sé nyaa echē sēnwēmtēnē bán séebáá á alongé. ⁹ Sēnwēmtén nén bán bébídte mbakú bán béwúu sé. Boη sékudé'áá mímén metake ábel séēsūmē' nlem áwεd yāl, boη pen sésum wée Dyōb, mó awē apuudte bad. ¹⁰ Kénée édíí bán sēmbé á nsal ní kwééd, ansōη sé. Nzé sédé á ndutul-tē, Dyōb débē ásoη sé. Sēsumé-'ε nlem nén bán ábē ásoη sé pónde téé eche sébēē á ndutul ámpē. ¹¹ Asoη sé akānned áde nyékānnadte sé. Bad híin bēlad mekáá ákānned sé, Dyōb-pe dénaméd sé. Nén débēl bad híin bésāgnēn Dyōb asoη áde ásóó sé.

Paale ahúde eke áse

¹² Dyam áde áde ábélé sédé kúmbe. Nlem níkénlé sé á abum nén bán, abé áde séwóó á nkōnsé-te wén, tanje nyaa eche sédíí ne nyé, ne nlem míme nísáá ne nlem nhóg, ádíí nyaa eche Dyōb ábélé áá ébē. Adén abé dénkēmbáá ne debyéé á moonyoη boη démbē ne nsimé ní Dyōb. ¹³ Chōm éche sétenléé nyé édíí éche nyéhēnlé alán, nyésōntén-ne. Nsumé nlem mée nyésōntēn mímén mekan pónde ésyāāl. ¹⁴ Ngáne nyémáá donje á mekan tēngene sé asōntēn, ndúbpé nén mée nyéēkoη sé asōntēn bwām. Nén débēl á pónde eche Sāngú Yesue ápéé, nyéēhel ahób bán nyédé kúmbe ne sé melemlem ngáne sémpē séhēnlé ahób bán sédé kúmbe ne nyé.

15 Adúbe áde méndūbēē meé nén áde mbále mentii meé mésēbē apε áwēn ábel boη nyétombwēn ngen éche élónténé ébe. 16 Mentíi meé mǎhyě áwēn nzé nkag á mbwóg e Masedonia, mentíi-’ε ámpē meé á ehúu métyēem áwēn ábel boη nyéwōngēn με áke á mbwóg e Judeya. 17 Ade mēmbeñlé mímén ntíi, énkēmbáá éche ríhelaá-se ríhəŋlén nlém á abum. Meébēlēē mímēm ntíi á nyaa e moonyoη. Meesaá néε mod awě akwēntan aá, “Eε, mǎbēl.” Boη ámbíd e pónde átim ahób aá, “Aáy, mébeñlé.” 18 A’sō é’ Dyōb áde ábele ngáne ahóbé aá móḡbēl, nzé séláŋgé nyé bán séēbēl dyam, sébelé sébēl-le dó. 19 Nzom echě ekáá boη nén ábe edii áyāle nkalaη mí bwām tǎηgene Mwān a Dyōb, Yesu Krístəə, míme με, Sailase ne Timotie sékánlé’áá nyé. Yesue eehóbéé aá móḡbēl dyam boη eétimē dó abel. Yesu Krístəə ábele dyam áde ahóbé aá móḡbēl. 20 Chōm ésyāəl éche Dyōb ahóbé aá móḡbēl, abelé mébeñlad abel áde ábélé boη debé ne Krístəə. Nén dóo ákáá boη áyāle mekan míme Yesue ábeleé syánē déhəbē bán, “Ebē nê” ábel boη Dyōb ákud edúbé. 21 Dyōb dóo ábélé boη syánē debé dédūbpē Krístəə. Dyōb dēn dóo áwógté syánē ábē ne Krístəə. 22 Ahédé-’ε syánē ábē e’chem ábe é’lúmte bán syánē dedé ábē bad, ahé-’ε syánē éche Edəádəη éche Esáá á nlém-té álúmed nén bán dεékūd bwēm é’syāəl ábe ahóbé aá móḡbē syánē.

23 Dyōb áde με mbóη nén aá chōm éche ríhóbéé édé mbále. Nzom echě enkəη boη menkēntím ámbíd á dyad á Kōrinto, edii áyāle meéhede’áá meé ríwóged nyé ndutul. 24 Séēhēdēē bán ébē byánán sēnyágté nyé ádúbe kéchéé. Boη pεn sébele nsón ne nyé, ábel boη nyébē menyinje áyāle nyēsūmné

á adúbe-tê.

2

¹ Né-ǎó, memmăd á nlém-tê nén mēé mēehyáá nyé anyín ámpē. Nzé mempě nwógté'áá nyé ndutul. ² Nzé nwógté nyé ndutul, mod éebáá awě ăwōgēd mē menyinje, áyāle nwógté bad ndutul ábe bēmbē bēwógté' mē menyinje. ³ Nén dǎó dēnkǎŋ boŋ ítēlē nyé enén ndín e kálag. Mēehede'áá mēé nzé mpedé áwēn, nyé bad ábe nyēwógté' mē menyinje, nyēwóged mē ndutul. Ndúbpé nén mēé nzé ndé menyinje, né nyé moosyǎál nyēēbē menyinje. ⁴ Ntēnlé nyé enén kálag nyaa eche ítélé áyāle membé ndutul, metake mébé mē á nlém-tê, ítélé-'ε chó ne mēsod. Menkēntelée nyé chó ábel boŋ nyēwōg ndutul, boŋ mentelé nyé chó ábel nyébíi ngáne ńdǎó nyé bwāmbwam.

Paale ad bad bé Kōrinto bēlāgsen mod awě abelé mbéb

⁵ Nzé mod abelé dyam áde áwógté bad ndutul, saké áwēm dēmpen dǎó ábélé dǎó, né abelé dǎó wēε nyé moosyǎál ámpē. Boŋ ádén dyam ádíí dyam áde méēhōbēē bwāmbwam. ⁶ Nkǎgsen níme bad híin átíntē echēn bēbágé ene ndín e mod, ńkwógnédé mǎó. ⁷ Boŋ nyētǎŋgéné nēε nyélāgséné mǎó nyēwéd-ε mǎó nlém á abum, ábel ndutul eche ákúdé eetómtán mǎó adenled. ⁸ Né-ǎó, ncháa nyé mēé nyélúmed mǎó bán nyédíi nyēdǎó mǎó. ⁹ Nzom echē enkǎŋ boŋ ítēlē nyé enén kálag edíi ábíi nzé nyēēbēl mam mēsýāāl níme ńhóbé mēé nyébel. ¹⁰ Kénzée awě nyélāgséné, mémpē nlāgséné mǎó. Dyam áde ńlāgséné, nzé édé bán nlāgséné dǎó, né

nlagsan dó áyāl echên. Krīstəə abelē abíí-’ε aá nłágséné dó. ¹¹ Debele nê ábel bon Satanε eetómé’ syánē áte, éesaá bán syánē deebíí’ε mwane míme Satanε.

Békale nkalanj tângene melë mékǎǎle

¹² Ade mǎpédé á dyad á Troas, ákal nkalanj mí bwám míme Krīstəə, Dyöb dēnnednéd με nzii ábel míme nsón. ¹³ Bon nłém ménkēmbáá με bwám á abum áyāle menkēntánné Titusε, mwǎnned a Krīstəə awě súmō sēbele nsón. Né-ǎǎ, menlyágtén bó, ríkǎg-ke με á mbwóg e Masedonia.

¹⁴ Nságnan Dyöb áyāle ayǎgké abel syáā dehele’ míme nkalanj akal. Abé áde dédíí ne Krīstəə ábélé dedé nēngáne bad ábe Dyöb ákóbé bon ályāgté áke dé akal nkalanj mí bwám mebwóg mésyāǎl. Dyöb ábélé bad bébyéε Yesu Krīstəə áyāle míme nkalanj míme syáā dékalé. Mmê nkalanj ríkag áfínté e bad ngáne elod é bwám. ¹⁵ Elod é bwám, elod é Krīsto, chǎǎ dédíí á’sō é’ Dyöb. Nzé dekale nkalanj tângene Krīstəə, bad bésyāǎl ábe bédúbpé míme nkalanj míme dékálé, Dyöb ásoo’ ádāb alongé. Bon bad bésyāǎl ábe bédúbpé míme nkalanj, Dyöb déesoó’ é ádāb alongé. ¹⁶ Ne bad ábe bédé á nzii eché epágnédé Dyöb á yǎl, nkalanj mí bwám míme syáā dékanléé bó rídé áwāb nēngáne ebébtéd é elod éche éwúε’ bó. Abíníí-’ε ábe bédé á nzii áke wéε Dyöb nkalanj mí bwám míme syáā dékanléé bó, rídii nēngáne elod é bwám áyāle syáā delānge bó bán bēbē á alongé ne Dyöb á ngíndé ne á ngíndé. Nzé-ǎǎ adé awě ahεεε abel enén nyaa e nsón? ¹⁷ Séesaá ngáne bad ábíníí híin ábe békale eyale é Dyöb ábel bon békud nsyáñ. Ne sé séēbēlēē nê, áyāle

Dyöb álómé sé ákal nkalaŋ ní bwâm, nímê nkalaŋ sêkale' mó ne nlém nhóg abé áde sédíí mod nhóg ne Krístəə, debíí-'ε nén bán Dyöb dóo álómé syáné ábel níme nsón.

3

Bekal bé nkalaŋ mé melě mékᵔᵔlē

¹ Nyêwémténé bán sêhóbe' mekan mé bwâm tâŋgene éched yāl ámpē-yε? Nyêwémténé bán séēβε nyé kálag ké'ε séhēd kálag áwēn, álúmed nén bán sêkwognédé ábel nsón átínté echên, ngáne bad bémpēe béβελεέ-yε? Séεβενlé nê. ² Nyêdíí sé á nlém-tê nêŋgáne kálag echě bétélé boŋ bad bésyāāl bélaā ábíi chōm éche édé áwēd-te. ³ Nyêlúmté' bán nyêdíí kálag echě Krístəə átélé boŋ álómén sé. Enén kálag eesaá kálag echě béténlé ínke boŋ edíi echě Edáádəŋ é Dyöb áde ábage alongé étélé. Bénkēntenlé enén kálag á meláa mīn, níme métánlé, boŋ bēntel chó á nlém ní baányoŋ. ⁴ Sêhóbe nén áyāle sêsumé nlém ne Dyöb abé áde sédíí ne Krístəə. ⁵ Sé bēn séēhēlēε-ε sêhób bán séhēle-ε sébēl nímén nsón. Sé bēn séēhēlēε-ε sébēl mó. Dyöb dóo ábélé boŋ séhēl mó abel. ⁶ Abelé sêkwōgnédé ákal nímê nkalaŋ mé melě mékᵔᵔlē. Méesaá nkalaŋ áhíd mbéndé é melě mé nchun. Bad ábe behíde ene mbéndé béwág, béēbāg-kaá ne Dyöb. Nkalaŋ áhíd melě mékᵔᵔlē níme séyágtéé, rídé nén bán Dyöb ábage bad Edáádəŋ éche Esáá, éβελε-'ε bébē ne mó á ngíndé ne á ngíndé.

⁷ Βοοβ-ρᵔᵔ, Μοσεε an'yágéd bad áhíd mbéndé é Dyöb é melě mé nchun. Dyöb dēntēl échén mbéndé ámīn e meláá níme métánlé boŋ áβε Μοσεε aá áyágte bad. Ade Dyöb dēmbéé Μοσεε

éché mbéndé, ambël e'só é'péné' Mosεε féréd, álúmed bán échê mbéndé édii échē. E'só é'péné'áá Mosεε nyaa echě bad bé Israel béehēle'áá mó anων á'sō. Boη kénéε é'péné'áá bwāmbwam, nímē mwayé mēmbootéd asud mwämpin mpín. Bad ábe bēnhid melě mé nchun bēnwē, bēnkēmbáá-'áá ne Dyöb. ⁸ Né-ωó, nzé sēyágte bad nkalan t̄ngene Edáed̄an é Dyöb, Dyöb délūmēd bad nēn áá nímē nkalan rítómténé etógnén abé á alongé á bad. ⁹ Dyöb dénlūmēd áá módē ngum áde ámbεé Mosεε mbéndé. Echê mbéndé émbël bad bēbii bán ákōgsēn bó áyāle mbéb níme bēbélé. Boη anabpé echě ngum alúmed abel áde ábélé boη sékalé' nímē nkalan níme rílūmte ngáne bad békobnadté áwe e'só. ¹⁰ Mbéndé éche Mosεε áyágté'áá bad bōód áhíd mbéndé é Dyöb émbē etógnén. Ayáged áde séyágtéé bad bōób bán Dyöb délagsén bó mbéb, bēbelé-'ε ngáne áhεdεé, dōó átómténé etógnén abé. ¹¹ Kénéε édii bán Dyöb dénlūmēd ngáne ádii etógnén áde ábélé melě mé nchun, melě níme mémē á esōη é pónDé, alúmté áá mótōmtēnē etógnén abé abel áde ábélé melě méékōlē. Mmén melě méékōlē móó méhāηléné alongé á bad, mébē-'ε abé ne abé.

¹² Né-ωó ngáne sésúmé nlém bán nkalan níme sékaleé rídé etógnén bwāmbwam, sékale mó ésebán sēbáá'. ¹³ Séēsaá nēngáne Mosεε. Mosεε ankúdtén e'só ábel boη bad bé Israel béēnyiné ngáne e'só ábe é'péné'áá mó é'dímεé. ¹⁴ Boη bēnkēnsōηtēnné. A mbále, bootyaa ene pónDé ápe chii, béehēléé asōηtén nēn bán apen áde e'só é'péné'áá Mosεε, nímē mpentéd rísúdé. PónDé ké ehéé nzé bad bēwógé mod aláá kálag e melě

mé nchun, béēsōñtānnē chōm éche béwógé. Edé nêñgáne abad ákúténé bó mewēmten. Nzé mod adé ne Krīstəə dēmpen dōo ásōñtanné. ¹⁵ A mbále, bootya ene póndé ápe chii, póndé ké ehéé echě béléáá mbéndé é Mosεε, ébelé ébé byánán abad ákúténé bó nsōñten nyaa eche béeheléeé chōm éche béléáá' é abíi. ¹⁶ Bon nzé bó ké ahéé adúbpe Sánjú Yesue, chōm éche ébâg nêñgáne abad éche ékutan bó nsōñten ébelé éhide. ¹⁷ Bəəb-pəó, Sánjwéeé adii Edəádəñ. Kéhéeé áde Edəádəñ éche Sánjwéeé édíi, bad béébāgkē á mehan-tê. ¹⁸ Syánē ábe Dyöb áhúdé abad áde dénkütēn syánē e'só, abé ádēd ábele' bad bēbíi ngáne ehúmé éche Sánjwéeé épédé abé. Bényíne' bán abelé syánē ngáne bad ábe bēbele ngáne Dyöb áhedéé. Edəádəñ éche Esáá éhəñlan syánē ahəñlen ne ahəñlen ábé ngáne Yesue ábel bad bényín ngáne ápédé ngíne abé. Sánjwéeé, mó awě adé Edəádəñ, mó abele nímén mekan.

4

Yesue alúmté syánē ngáne Dyöb ápédé abé

¹ Ngəl echě Dyöb ádíi chó ekəá bon sékalé' nímén nkalan. Né-ɔó, séedonlé mekuu ámbíd ákal mó. ² Séebenlé mekan mé e'sōn níme bad bēbeléé á mesəəm-tê. Séédōgnēē nyé ehób é nsəl, séēhəñlan-naá eyale é Dyöb ádog nyé. Bon pen, sēyágte' bad eyale é Dyöb nyaa echě bad bésōñtēnnē chó. Ngáne séyágtéé eyale é Dyöb ne nlém nhóg, mod-mod eéhēlēē-se ahób á nlém-tê aá sédoge mó. Sēbíi bán Dyöb abíi kéchéé éche sébeléé. ³ Nzé donje á bad béehēle nkalan ní bwām níme séyágtéé asōñten, né édii wéeé ábē bad bēedúbpeé mó.

Ngáne béédúbpeē Dyõb béebáá ne mó. ⁴ Satane, nkamlene a nkõnsé, akamlan mewêmten míme bad ábe béedúbpe Krístæ. Béehelée-se bésõntén bán nkalanj mí bwám nílúmte ngáne Krístæ ápedé etógnén abé. Krístæ adíí néē Dyõb dën. ⁵ Nê dõõ ákákõ bonj séékālē tângene éched yál. Bonj sêkanle nyé bán Yesue mó adé Sãngwéé. Sêdñi bembaledé ábēn áyāl e Yesue. ⁶ Dyõb áde dénhõb aá, “E’nyínen bé ekíde é’bê wée ehíntén énsēbēē abé,” mó abelé míme nkalanj tângene Yesue ábē nêngáne e’nyínen bé ekíde ábe é’pene’ syánē á nlém-tê. Syánē baásyāāl ábe dedúbpe Yesue bõõ Dyõb ábénlé nê. Dyõb ábélé nê ábel bonj bad bébii nén bán módé etógnén abíí áde bad bébñí’é bán Yesu Krístæ adíí néē mó.

⁷ Bonj nkalanj míme Dyõb ábágé sé ákal, nídii chõm éche étómténé etógnén abé. Sêdñi nêngáne mbeé e mæg echē chõm édíí áte. Nén ábénlédé ábel bonj bad bébii nén bán ngíne echē echabé ámñn ehúú ne Dyõb saké ne sé. ⁸ Sêkude nyaa é ndutul híin bonj séelyāgēē áwēd-te. Donje á pónde séebyéé’é dyam áde sébeléé, bonj séehóbéé nén bán Dyõb déelúmédté se chõm éche sétáñgéné abel. ⁹ Bad bétagte se pónde té bonj Dyõb déetadté sé. Bélõgne sé, bonj Dyõb déekwëntánné aá béwúu sé. ¹⁰ Kéhéé áde sékagké ákal nkalanj mí bwám sêhédé á nlém-tê nén bán bad béhede’ sé awúu ngáne bñwúu-’é Yesue, bonj bad bébii bán Yesue adé á alongé, mó-’aá ahág sé ngíne áte abé áde sédñí á alongé. ¹¹ Sêbii nén bán kénéé sédñí á alongé bõõb, sêdé benben ne kwééd pónde té áyāle sêbenle Yesue. Nén adé ábel bonj bébii bán Yesue adé á alongé, mó-’aá ahág sé ngíne áte abé áde sédñí

á alongé. ¹² Né-ɔ́, sêkwěnténé kwééd âbel bon nyékud alongé áde déemaá’.

¹³ Sêdii melemlem ngáne mod awě ahóbé ngáne éténlédé á kálag e Dyõb nén bán “Ndúbpé wε, né-ɔ́, nkale’ tângene wε.” Melemlem ngáne ane mod ándübēē Dyõb, sémpē sêdúbpé Dyõb, sémpē sêdii sêkale-’ε tângene mó. ¹⁴ Sêbíí bán Dyõb áde ápuúdté Sánjú Yesuε dépuúd-te sémpē ábē á alongé ámpē ne Yesuε. Dyõb dépēén-ne sé ne nyé wéε ádíí. ¹⁵ Metake mésyāāl níme sêkudεé médii áwóngen nyé, ábel bon nzé bad híin bėwógé eyale é Dyõb, nsimé ní Dyõb méběl békud alagsen dé mbéb, bėbūd-te mó aságnén. Nén déběl bad híin bėkené’ Dyõb.

¹⁶ Né-ɔ́, séedonlé mekuu ámbíd ákal nkalaŋ ní bwâm, kénεé édíí bán ngíne esude’ sé á yāl, kénē Dyõb áwede’ sé nlém á abum, áhāg-ke sé ngíne áte mbwε té. ¹⁷ Baá metake ábe sêkudεé bɔɔb bėesaá ábe sétagtεé nlém á abum. Sêkude metake bɔɔb bon ehúmé éche ébē ne sé échāb ámīn nyaa echē séekamténné metake níme sêkúdé á nkõŋsé wén, ébē-’ε ne sé á ngíndé ne á ngíndé. ¹⁸ Nê dɔɔ ákáá bon séenyíné’ metake níme sêkudεé bɔɔb née dyam. Bon sėbānné nlém áyāl e bwēm ábe Dyõb ákõŋnédé sé, kénεé édíí bán séenyínéé bó. Bwēm ábe sényínéé bɔɔb é’dé dásɔ́ áyāl e esón é póndé, bon bwēm ábe sėheléé-se sennyín bɔɔb, bėbē á ngíndé ne á ngíndé.

5

Déékūd yāl ékɔ́lē ádyõb

¹ Sêbíí nén bán éched yāl éche sébéénné á nkõŋsé edii née e’bem ábe sédyεε’é áte. Nzé bėpáá ábē

e'bem, sêbíí nén bán sêwóó ndáb ádyōb echē moonyon ēeloo'ē. Dyōb dōo álóo' chó, ēbē-ε á ngíndé ne á ngíndé. ² Sêkōmad áte bōob á ebem-tē wén, sêwane áte bán ene ndáb echē ebíde' ádyōb ékútēn sé ngáne mbóté ékútanné mod. ³ Nzé sêdé ene ndáb áte, sêebáá nêngáne mod awē adé nsōb. ⁴ Abéen áde sêbééné enén yāl á nkōṣsé te wén, sêkōmad áte adenled áde nén adénlédé sé. Eesaá nén bán sêhede enén yāl e nkōṣsé ahúd, bon sêhede yāl ékōlē eche edé ádyōb, ábel enén yāl e nkōṣsé echē ewág émaa, étim yāl echē ēbē á alongé. ⁵ Dyōb dōo ábōṣséné syánē ákud nímén nhəṅlén alómmé-ε syánē échē Edəədəṅ éche Esáá álúmed nén aá adén akan débenléd.

⁶ Né-ōó, pónde téé desume' nlém nén bán abé áde dídí ne échén yāl á nkōṣsé, deesaá hōm ahóg ne Səṅgwéé. ⁷ Sêdé á alongé á nkōṣsé ne échén yāl, áyale sêdúbpé mó saké ngáne sényíneé mó. ⁸ Sêsumé nlém nén bán ábe syánē yāl ékōlē, sêhede-ε échéd yāl é nkōṣsé atede áke débé ne Səṅgú Yesue. ⁹ Né-ōó, níméd nlém nisyāal nítəṅéné abé áwóged Yesue menyíṅge áyāl e kéchéé éche débéléé, ké ébé bán sêdé ne échéd yāl á nkōṣsé, ké'ε séesaá ne chó. ¹⁰ Syánē mod téé átyēēm á nkáásé á'sō ábe Yesu Křístə epun éche ákāādtē moosyāal, təṅene mekan níme ábélé á pónde echē ábédé á nkōṣsé. Mod té ákūd nsábe təṅene mekan mé bwám ké'ε mé mbéb níme ábélé.

Abé á nchemten ne Dyōb

¹¹ Ngáne sêbíí bán Səṅgwéé ákāād bad, sébagé-ε mó edúbé, sêwane' áte nén bán bad bésōṅten nén bán nkalan níme sékaléé nídé mbále. Dyōb ábíí nyaa é bad éche sédíí, mbíí-ε méé nyémpē

nyêbíí nyaa é bad éche sédíí, ndúbpé-'ε mεé nyêbíí-'ε bán sêkale mbále. ¹² Séehóbéé mekan mé bwâm tâηgene éched yāl ámpē. Boη pen sêhede bán nyéwōη nzom ábéen sé kúmbe, ábel boη nyéwōη dyam áláa bad ábe bédé kúmbe áyāl e mekan níme bébeleé níme bad bényíneé, saké áyāl e mekan níme médé bó á nlém-tē. ¹³ Donje á bad béhóbe bán sêhóbe mekan néε bad ábe nló méēsáa'έ áte. Nzé nê adé mbále, né Dyōb dōo sébagéé edúbé. Nzé sêhóbe mekan néε bad ábe nló nsáa' áte, né áwōηgen nyé dōo séhóbeé. ¹⁴ Edanje éche Krístæ chōo étédé sé nlém á abum ábel mekan níme sébeleé, áyāle sēmadé á nlém-tē nén bán Krístæ awédé á nló mí moosyāál. Né-óó, édé nêηgáne moosyāál áwédé. ¹⁵ Anwé á nló mí moosyāál ábel boη bad ábe bédé á alongé, alongé adáb déelūmtē bán bédé á alongé áyāl echáb dēmpen. Boη pen bédé á alongé áyāl e Krístæ, mó awé anwé, boη Dyōb ápūūd-τε mó á nló mímb.

¹⁶ Né-óó, bootya bōob, déēnōnē mod nyaa eche moonyoη ánōneé. Kénéε édíí bán sēnōné'áá Krístæ á nyaa e moonyoη, séēnōnēē mó nê ámpē. ¹⁷ Né-óó, kénzée awé adé mod nhóg ne Krístæ, adii nhagtéd mékōōlē. Mmē mbeltéd mé nchun nsyāāl nímbáá atóm awóó-'ε mbeltéd mékōōlē nsyāāl bōob. ¹⁸ Mmén mbeltéd mékōōlē nhúú ne Dyōb. Abelé syánē detimé ásē ne Krístæ, abagé-'ε syánē nsón ákale bad nén bán béhele bébê nsan ne Dyōb. ¹⁹ Chōm éche ríhóbeé édíí áyāl e kwééd echē Krístæ áwédé á awog. Dyōb ábélé bad bépédé á nchemtēn ne mó. Dyōb déētóo'áa mbéb níme bad bébéle, abagé-'ε syánē nsón ákale bad nén bán béhele bébê nsan ne Dyōb. ²⁰ Aláa áde Dyōb álāηgéé sé

mekan âláa bad sêdîi bad ábe béhóbpe Krīstæ. Sêsimé nyé etúu áte á dīn á Krīstæ nēn nyépe á nchemtēn ne Dyöb. ²¹ Dyöb dêmpwēd Yesue âtag áyāl e mbéb nīsyāal míme syánē débélé. Yesue enkēmbeñlé mbéb ké nhóg, boñ kénê ankwentén atag áwēd nló. Dyöb álágséné syánē mbéb ahóbe-’ε aá déēbēlēē mbéb ámpē melemlem ngáne mómpē ébelelé mbéb.

6

¹ Né-óó, sé ábe sêbele’ nsón ní Dyöb ne Dyöb, sêcháa nyé nēn bán nsimé ní Dyöb míme nyékudéé méēbāg ngēn. ² Dyöb áhóbé ngáne étéñléde nēn aá,

“Ade pónde épédé echē etāngéné, menwóg chōm éche nyéhóbé.

Ade epun é e’soosō-’ε épédé, menwóngén nyé.” Nyénōne’ pónde nēn bōab echē etāngéné, eche nyétāngéné nsimé ní Dyöb akud. Nyénōne’, epun épédé éche nyéhēle nyékud e’soosōñ.

³ Séekáá’ε modmod nzii, ábel boñ awusé déēnyīnnād áyāl e nsón míme sêbeleé. ⁴ Boñ pen, nēngáne bembālede bé Dyöb, sêlūmte’ yāl nyaa ésyāal ábé bad ábe bébele’ mekan míme métāngéné. Sêwánlé e’kanj bé nlém é’ ngīne tāngene metake míme sékudéé, tāngene alongé áde álenlad sé áte, ne ndutul éche étáne sé. ⁵ Sêkude mbéte, béhāg sé á mbwōg, ndun e mod empēén epuutéđ béchodé sé yāl áte, sêbele ntú ní ngīne, sēnanjé’ e’pin, sédyéé-’ε nzaa. ⁶ Sêlūmte’ ámpē bán sêdīi bembālede bé Dyöb ábel áde sêbeleé mekan mé bwām ne e’sāj bé nlém, abe áde Dyöb ábágé sé nsōñten ábíi alongé áde sétāngéné awōñ, awesen áde

séwēsanné, ne awóon áde séwónné bad bémpēe nlem mí bwâm. Edaðəŋ éche Esáá chós élyágte sé, sédəə-’ε moosyáal ne nlem nhóg. ⁷ Nkalaŋ míme sékaleé rídii nkalaŋ mí mbále, ngíne e Dyöb chós-’aá sébenladté ákal mós. Abel áde sébeléé mekan míme métəŋgéné ábéle bad béewóó’ε dyam dé mbéb ké ahóg ábán sé á yál. ⁸ Séəbē sébenlé Dyöb ké béken sé, ké’ε béekene’ sé. Ké bad béhəbē sé mekan mé mbéb áyāl ké’ε mekan mé bwâm. Bad béhəbe bán sélúmté bán sédé ndín é bad éche séesaá, boŋ sédii bad ábe séhəbé bán sédé. ⁹ Bad bébíí sé bwâm boŋ bémpēe bényíne’ sé bán sédii bad ábe béesε dyam dé abelen. Bad béwəmtan bán séebáá á alongé boŋ kénê sédii sédé á alongé. Sékude metake á mekáá mé bad boŋ kénê, béewúú’ε sé. ¹⁰ Sédé á ndutul té, boŋ kénê, séwóge menyinŋe pónde ésyāal. Kénéε édíí bán séebudéé chóm awón, boŋ kénê nsón míme sébeléé mbéle bad híin bédúbpe Dyöb. Né-ós nê ábéle bébúde bwəm awón bəəb. Kénéε séewóó’ε chómchóm, nhən ní Dyöb rídii mímed.

¹¹ A-bad bé dyad á Kōrinto, sétənlé nyé chóm ésyāal ésebán sékoŋnad nyé dyamdiam. Sélúmté-’ε ngáne nlem rídii sé áte áyāl echən. ¹² Sédəə nyé, séebáá-’aá alúmed bán sédəə nyé. Nyé pen nyélúmté sé nən nyéədəə’ε sé. ¹³ Nhəbe áwən bəəb néε ábəm bán. Nyémpē nyədəŋ sé ngáne sémpē sédəə nyé.

*Nyéəbēle’ mekan míme bad
ábe béedúbpe Krístəə bébeléé*

¹⁴ Nyéəbág nlatén ne bad ábe béedúbpe Krístəə. Nhəbe nən áyāle bad ábe bétəŋgéné á’sō é’ Dyöb,

béewóó' é dyam abelen mekan níme e'bébtéd é bad bébeléé. E'nyínen bé e'kíde béewóó' é dyam abelen ehíntén. ¹⁵ Krístəə eewóó' é dyam abel ne Satanε. Mod awě adúbpé Krístəə eewóó' é dyam dé abelen mod awě eedúbpe. ¹⁶ Ndáb-e-Dyöb eewóó' é dyam dé abelen ndáb echě bad bébenléé myöb mémpēe. Nhóbe nén áyāle dedii ndáb e Dyöb, Dyöb áde ádé á alongé. Edé nén ngáne éténlédé bán Dyöb áhóbé aá,

“Mébē ne ábēm bad, rídyēē-'ε áwāb.

Bébelé me nēngáne ádab Dyöb, με-'ε métēd bó nēngáne ábēm bad.”

¹⁷ Sāngwéé alānge ábē bad aá,

“Né-ωó, nyéte de, nyéebág-ke ne bad ábe béedúbpe me.

Nyéewóó' dyam abel ne e'bébtéd é mekan níme bébeléé.

Měkōb-pe nyé née ábēm bán.

¹⁸ Mébē nyé sáá,

nyé-'ε nyéēbē ábēm bán.

Me Dyöb á Ngum με-εé nhóbe'.”

7

¹ A-baányan bé edənge, ngáne Dyöb áhóbé aá módii awesyánē Sáá, syánē-'ε debé ábe bán, déte de mekan níme méwógte syánē mbinde á ekob é yǎl ne á edəədə. Syánē débε Dyöb edúbé, déwōn-'ε alongé áde ásáá, nē débǎl débagé Dyöb edúbé ngáne éhednadté.

Paale adé menyinje

² Nhεde μεé nyédəη sé ne nlém rísyāāl. Séēpānnēē modmod, séēbēltēē modmod mbébb, séēdōgēē-'ε modmod. ³ Meehóbbéé nén áhóbb

nyé. Mensébé nyé atele nén μεέ, sêdáo nyé bwâmbwam, ké á kwééd ké'ε á alongé, dĕbē debé mod nhóg. ⁴ Nkumne nyé ekáá á tâl. Mbééné nyé kúmbe. Nyêwédé με nlém á abum bwâmbwam nyaa echĕ rítómténé menyinĕge abé kénέε sékudεέ metake bwâmbwam.

⁵ Ade sépédé á mbwóg e Masedonia, sênkênkómέέ áte. Sékudé'áá metake nyaa ne nyaa. Bad bépentánnáá ne sé mbwóg-κε ríbé sé áte áyāle sêkám tánnáá nyé. ⁶ Boĕ Dyōb áde áwéde bad ábe béewóo e'lyóg bé nlém, nlém á abum, dénwēd syánē nlém á abum alóm áde ánlōmmē Tituse áwesyánē. ⁷ Saá-kaá échē eπε chēmpen êmbel sêwóg menyinĕge, boĕ awéd áde nyénwēdtē mó nlém á abum dénwōgēd sé menyinĕge. Anláá sé ngáne nyédáá με anyín bwâmbwam, aláá-ε sé ngáne nyénwōgkē pél áyāle ndutul eche ebédé nyé á nlém-tê ngáne nyénkênwógédtē με menyinĕge. Anláá-ε με ngáne nyéwóo nlém áte ábé με ámbíd. Ade Tituse álángé sé nímén mekan, membé menyinĕge bwâmbwam.

⁸ Kénέε édíí bán ene kálag echĕ mēntelεé nyé enwógéd nyé ndutul, meésáá ngol nén με nténlé nyé chó. Kénέε édíí bán membé ngol atel áde mēntenlé chó, nnyíné nén μεέ echem kálag echĕ ríténlé nyé ewiidé nyé nê á esón é pón dé. ⁹ Boĕ bōōb ndé menyinĕge, saké áyāle ménwōgēdtē nyé ndutul, boĕ áyāle ndutul eche nyénwōgkē ebélé nyéhĕĕléné áden abé dé mbéb nyēbele' ngáne Dyōb áhεdεé. Nyénwóg ndutul ngáne Dyōb áhédé'áá aá nyéwóg. Né-ōó, ndutul ké ehéé echĕ sēmbenlé boĕ nyéwóg, enkēmbébénné nyé. ¹⁰ Nzé ndutul edé mod á nlém-tê ngáne

Dyōb áhedeé, ane mod abelé ahənlén áde abé dé mbéb ábelé' ngáne Dyōb áhedeé. Nén ábele' ane mod ákūd e'soosə, nê déewiidéé modmod ámpē. Boŋ bad ábe bédúbpé Dyōb, ndutul echē edé bó á nlém-tê áyāle bédíí baányosə ebelé' bəwāg á edəədəŋ. ¹¹ Boŋ ndutul embé nyé á nlém-tê ngáne Dyōb áhedeé aá ébê. Né-óó, nyénəne' chōm éche nê ápíínédé nyé. Nyēhedé'áá bán mbii nén mēé nyēwane áte álúmed bad nén bán nyéēbēlēē awusé ké ahóg bəəb. Meliŋgá mémbe nyé áte nén bán ábē bad bēbélé awusé á etūn é pónde nyédé ahób bán nyēlāŋge bó bán bésog mbéb abel. Nyēnwóg mbwóg nén bán Dyōb dékəgsən nyé nzé nyédé nyēbele échén ndín é mekan. Nyēndəŋ me anyín bwāmbwam, nyēnwōŋ nlém ábē me ámbíd, nyékəgsān-ne bad ábe bēbele mbéb. Abel áde nyébélé mímén mésyāāl, álúmté sé nén bán nyéēbēlēē mekan mé mbéb. ¹² Né-óó, kénéé rítélé ene kálag, menkēntenlé chó áyāle mod awē abelé epandé ké'ε mod awē bépánné boŋ ntelé chó ábel boŋ nyébii á'sō é' Dyōb nén bán nyékoó sé adəŋ. ¹³ Nê dōó ákóó boŋ nyéwēdē sé nlém á abum.

Saá-kaá e'wéd bé nlém á abum bēnpən, boŋ sēmbé menyiŋge bwāmbwam anyín áde sennyinnē Tituse adé menyiŋge áde ápédé. Anlāá sé ngáne nyébélé boŋ asóg atag áte. ¹⁴ Membé kúmbe álāa Tituse ngáne nyédíí bad bé bwām, nyēnkēnwógéd-taá me e'sōn áyāle nyēnlúméd nén bán mekan míme ménlāā'é mó médé mbále, ngáne mekan mésyāāl míme sénlāā'é nyé médíí mbále. ¹⁵ Nê ábélé míme nlém rítimé' áwēn tómaa ké ngen e'só, akamtən áde ákamtanné ngáne nyé moosyāál nyēnwōŋgē nlém ábel mekan míme

ánlāā' é nyé aá nyébel. Nlém rítme mó áwēn ámpē nzé akāmténé ngáne nyênkobpé mó ne edúbé, nyéwóngén-ne mó ne nlém nhóg. ¹⁶ Ndé menyinge áyāle nsumé nlém nsyāā́l áwēn.

8

Bad bé Kristo bétāngéné bad ábe bétógnéné awōngēn

¹ Bōōb-pōō a-baányan, sēhede bán nyébíi nén bán Dyōb ábágé nímē nsimé wéε bad bé Dyōb ábe bédé á mwembé níme rídé á mbwóg e Masēdonia ábel bon bésále ekáá áte. ² Békúdé metake mé ngíne níme mékəge bó áte bwāmbwam. Kénéé édíi bán bédé atóg bwāmbwam, bésánlé ekáá áte bwāmbwam, bédé-'ε menyinge. ³ Ndé mbōn nén mēé, bēmbě chōm éche bēnwōngē, bēntōmtēn-ne abε tómaa chōm éche bēmbēε bēbage'. Bébágé'áá-'ε ngáne nlém nímāb ménlāā' é bó. ⁴ Bēnchān syánē bwāmbwam ábé menyinge áwōngēn bad bé Dyōb bé Jerusalem ngáne bómpé bēbeléé. ⁵ Bēmbě́l tómaa ngáne sēnwēmtēnnē. Bēnsēbē ádāb alongé abε á mekáá níme Sāngwéé. Ambīd enē bēmbě́ ádāb alongé áwēd mekáá ngáne Dyōb áhedeé aá bēbel. ⁶ Né-ōó, sēcháa' Tituse awē ambootéd nímén nsón ne nyé nén bán ádíi áwōngan nyé, nímén nsón níme nyésánlé ekáá áte, nyébāgē-'ε bad kéchéé éche bétógnéné ne nlém nhóg, nyépid mó á asóg. ⁷ Bōōb-pōō, nyēbele bwām á menzii mésyāā́l. Adúbe áwúú nyé áte. Nyékale' nkalan mí bwām, nyébíi mekan mé Dyōb, nyéwóó nlém áwōngēn bad nyédāá-'ε sé bwāmbwam. Né-ōó,

sêhede bán nyébele bwâm, kááŋne âsale ekáá áte, nyébage-’ε bad kéchéé éche betógnéné.

⁸ Meekamlánné nyé âbel nén. Bonŋ ngáne rínyíné bad ábe bédúbpé béwōŋgan bad bémpēe, nhede mēé nyémpē nyélúmed ngáne nyédáá bad bémpēe. ⁹ Nyêbíí ngáne eched Sáj, Yesu Krístəə áwōŋganné nyé âsale ekáá áte. Kéchéé éche Dyōb áwóó mó awóó. Bonŋ kénê á etútú échēn antedé nímē nhən rísyāəl ádyōb ápē á nkōŋsé abé nēe ntógétōke ní mod. Ambēl nê âbel bonŋ nyékud nnam míme Dyōb ábageé bad.

¹⁰ Mbage nyé elébé nén mēé, mwē míme rítómé nyêmbé bad bé e’só áwōŋ nlem áwōŋgen bad, nyêmbé-’ε bad bé e’só ábooted bad awōŋgen.

¹¹ Bəəb-pəó, nyétāŋgéné nsón míme nyébóótédé amad. Nê débēl bad bēbíí nén bán nyédé mbonŋén âbe ngáne nyéwóó âpid-te nê á asóg melemlen ngáne nyêmbonŋénné ábooted nê. ¹² Nzé ewóó nímē nlem âbe mod chōm ngáne éwóó chó, ébelé ékobnéd ne Dyōb. Dyōb déehedéé aá mod ábe tómaa chōm éche áwóó.

¹³ Meehábéé mēé nwōŋgen míme nyébageé bad ríwōŋgen bó bonŋ nyé bēn nyébê á metake-té, bonŋ nhede mēé nyé moosyāəl melemlen, nyéwōŋ chōm éche ékwógnédé nyé mod-téé. ¹⁴ Bəəb-pəó abud áde nyébúdé bwēm awōŋ, nyéwōŋgan bad ábe bédíí bēhede’, âbel bonŋ á póndé eche nyémpē nyétōgnēnnē bómpē béwōŋgēn nyé. Nê débēl mod téé áwōŋ. ¹⁵ Eténlédé á kálag e Dyōb nén bán, “Mod awē ambud awōŋ, enkēnwōŋgé tómaa ngáne ántōgnēnnē, awe mó-’ε enkēmbud awōŋ, andíí anwōŋ ngáne ántōgnēnnē.”

Bélómé Tituse bó á Kōrinto

¹⁶ Nságnan Dyōb abε áde ábágé Tituse ámpē nlem áwōngεν nyé melemlem ngáne ábágé με.

¹⁷ Tituse eépāgkē áwēn áyāle sélāngē mó bán apε, bon apag káōη ne áyāle awóó nímé nlem áπε, apag áyāle mwēn adáá apε. ¹⁸ Sélómne mó mwānned a Krīsto ampée. Anén mwānned a Krīsto, abyééné átíntē e mwembé nsyāal akal áde ákalée nkalanj ní bwām. ¹⁹ Saké alóm áde sélóméé mó dēmpen, mwembé mēmpwεd mó áhoon sé ngáne sébελέε nsón áwōngεν bad ábel bon edúbé éche Sāngwéeé ényínned ne álúmed nén bán sēwóó nímé nlem áwōngεν bó.

²⁰ Séēhēdēē bán modmod áhōb dyam dé mbéb tēngene nímén nsón mé asále dé ekáá áte níme sébελέé. ²¹ Sēwóó nlem ábel dyam áde átēngéné saké á'sō ábe Sāngwéeé dēmpen bon káōηne á'sō é' baányonj.

²² Sélóme' mwānned a Krīsto áwēn nchoo ne Tituse bó. Alúmté sé á menzii híin aá mówōō nlem áte áwōngεν nyé. Bōb-πε áde ályágé nlem áwēn, anābpé nlem awóη áwōngεν nyé. ²³ Tituse mó ne mó ayōgkē με ahoon ábel nsón áwōngεν nyé. Abíníí bānned bé Krīsto ábe békag ne Tituse bédii bad ábe mwembé mélómé á dīn ádāb, kéhée-'ε wéeé békíí mam níme bébελέé mépiinad Krīstəə edúbé. ²⁴ Né-óó, nyélúmed ábén bad nén bán nyēdəó bó. Abel áde nyéβenlé nē, mwembé níme nílómé bó mēsōηtēn nén bán nén dōó ákás bon sékumné nyé ekáá á tēl.

9*Békag bad bé Krīsto bé*

Jerusalem mōné asarjed

¹ Βοῶb-πῶό, éesaá etógnén με átele nyé t̄ngene nsón míme séwōnganné bad bé Dyōb. ² Mbíi nlém míme nyéwóó áte áwōngεν bó, mbééné-’ε nyé kúmbe awōη áde nyéwóó nlém áwōngεν bad ábe bédé á mbwóg e Masedonia. Menláá bó nén μεέ, “Nyé ábe nyédé á mbwóg e Akaya, nyêmbé mboηsén se mpú-mwě áβε bó mōné.” Nlém míme nyéwóó áwōngεν bad rítédé bó bad híin nlém á abum ábel melemlem. ³ Βοῶb-πῶό, nlóme’ ábén bānned bé Krīsto áwēn, ábel boη ahób áde séhóbéé bán sêkumne nyé ekáá á t̄l déēbāg bán sêkale metóm. Boη ébē bán ngáne r̄lángé bó μεέ nyéēbē mboηsén áβε bó mōné, nyéēbē-’ε nê dēn. ⁴ Né-ῶó, nzé mpedé áde bad bé Masedonia bépédé ne με boη ntáné nyé áde nyéēboηsενεέ, séēkwāg bwāmbwam, nyé-’ε ámpē nyékwāg. ⁵ Né-ῶó, nê d̄ῶó ákás boη r̄d̄ōl áte nén μεέ édé etógnén álóm ábed bānned bé Krīsto á’sō, ábel nyémad nwōngεν míme r̄chábé ám̄in míme nyéhóbé bán nyéēβε bó, aboηsen. Nzé nyēbelé nê, né nwōngεν r̄syāāl mébē mboηsén nzé mpedé. Nén délūmēd nén bán nyébage ne nlém nhóg saké áyāle sényágté nyé.

⁶ Nyébii nén bán mod awě eébude awén, eébudté ahúd, awe mós-’ε abudé awén ábūd-te ahúd. ⁷ Nyé mod té áβε mōné ngáne míme nlém r̄lángé mó. Mod éēbāgē sé nlém r̄k̄oglád mó á abum ké’ε ébé byánán bényágté mod. Dyōb adáá mod awě abage ne e’sán bé nlém. ⁸ Dyōb déβε nyé kéchéé éche nyétógnéné abel boη nyéwōη chōm ésyāāl éche ékwógnédé nyé ásále ekaá áte áβε bad bémpeē. Nén débēl nyéēbude’ bad mekan mé bwām abele. ⁹ Eténlédé á kálag e Dyōb nén bán,

“Asánlé ekáá áte ábe betóótōkē bé bad nwōηgen, bad béechaténné ábē e’boη bé nlém.”

¹⁰ Dyōb dōo ábage bad bwēm ábe béwénéε, ábage-’ε bad chōm éche bédyákē. Ábe nyé bwēm ésyāāl ábe nyétógnéné áwén, ábēl é’kwōg é’chyáá mbote eche ebuú áte bwāmbwam. Ábel nén áyāl e e’boη bé nlém ábe nyéwóo. ¹¹ Dyōb débēl nyébé nhōn áyāl e chōm ésyāāl, ábel boη nyésále ekáá áte. Nén débēl bad híin básagnēn Dyōb áyāle nwōηgen míme nyébageé bó míme ríhúú ne sé. ¹² Ábel áde nyébeleé nén, déesaá áwōηgen bad bé Dyōb dēmpen, boη áde káēne álúmed bán bad híin básagnan Dyōb bwāmbwam. ¹³ Mekan míme mímén nsón míme nyébeleé nén mébidēdte áwed, mébēl bad híin bébage Dyōb edúbé áyāle nyébele ngáne nkalan mí bwām míme Krīstāa ríhóβεé, nyélūmtē-’ε ábēn e’boη bé nlém wéε bad bé Dyōb ábe bédé á Jerusalem, nyélūmtē-’ε wéε bad bé Dyōb bēmpēe. ¹⁴ Béwóo nlém ányín nyé, békānnād-te nyé áyāle nsimé rí Dyōb rídé ne nyé. Mmē nsimé ríchábé ámīn bwāmbwam. ¹⁵ Nságnen mbē ne Dyōb áyāle abagé syánē nsimé míme rílélé ahəgten.

10

*Paale aláηgé bad bé Kōrinto
ad míme nsón rítāηgéné*

¹ Mē Paale, mē awē mpwiítédé nsudte-’ε yāl nēηgáne Krīstāa, ncháa nyé. Baahóg béhóbe’ nén bán nzé ndé ne nyé mbelélé ríwógé mbwóg. Bán boη nzé meésé ne nyé, mbelélé rítenlé nyé kálag éche éwúú áte. ² Ncháa nyé nén mēé nyéébēlē’ ngáne ábē bad bébeleé ábel boη nzé mpedé áwēn, ríhóben nyé ésebán mbáa’ dyamdyam. Bad ábe

méhōbēnnē bédii bad ábe bēhōbe bán sēbele nsón ngáne bad bé nkōhsé bébeléé. ³ Kénéé édii bán sēdé á nkōhsé-te, séēwānēē nzum ngáne bad bé nkōhsé béwanéé. ⁴ Bwēm ábe séwannéé nzum béesaá melelem ngáne ábe bad bé nkōhsé béwannéé. Boŋ bwēm é' nzum é' ngine é' Dyōb bōo sébenladté ábébed mebwóg mé ngine níme ábēd bad bé ekoyí. Abén bwēm é' nzum bōo sébenladté ásuded mpentēn ké rihéé níme bad bēpēenéé níme méesē mbále. ⁵ Sébenlad bó ámpē ámad mehób mé kúmbe níme bēhōbéé níme mébele' boŋ bad béēbyē' Dyōb. Sébele' bad bēhōjan nímab mewēmtēn ábel nímab mewēmtēn mésyāāl mébē nyaa éche Krīstā áhēdēé aá mébē. ⁶ A pōndé echē nyēbenlé ngáne Krīstā áhēdēé ne nlém nīsyāāl, dōo sébohsēnnē ákōgsēn kēnzēé awē alúmté aá móobenlé ngáne Krīstā áhēdēé.

⁷ Nyénōne' chōm éche édé nyé á'sō-te. Mod ké ahéé awē asumé nlém ne Krīstā ábii aá ngáne módii, nē dōo sémpē sédii ne Krīstā. ⁸ Ké menkūm ké ekáá á tál áyāle ngine eche Sāngwéé ábágé me tómaa ngáne nkuméé bōob, méewógké e'sōn. Abagé me ene ngine áwéd nyé áte saké ásuded nyé adúbe. ⁹ Meéhēdēē méé ényīned nén bán kálag éche rītenléé nyé édii áwóged nyé mbwóg. ¹⁰ Nhóbe nén áyāle bad bēhōbe bán kálag éche rītenléé nyé éwúú áte, éwóó'-ε, e'yale bé mbéb áte. Bēhōbe'-ε ámpē bán boŋ nzé mmēn ndé, meewóó'ε ngine, kéchéé éche rīhōbéé'-ε éewóó'ε ngine ké póg. ¹¹ Bad ábe bēhōbe nē bēbii nén bán kéchéé éche rītelé á kálag, nzé méesē ne nyé, mēbel chó nzé ndé ne nyé.

¹² Séēhēlēē-se sēhób mbēd bán sēhāgtan yāl, ké'ε sé bán sēdé nyaa póg ne bad ábe bēhōbe'

mekan mé bwâm áyāl echâb. Boŋ ngáne bèn ne bèn béhəgtanné yāl, béhəbē-’ε bán bèn ne bèn bétómné, bédé eyókéł. ¹³ Boŋ sé pɛn séékūmēē ekáá á tâł tómaa ngáne sétəŋgéné akum. Hǒm áde Dyöb álómé sé aá sébel nsón dɔɔ sébéenéé kúmbe. Nsón míme sébeleé átíntê echên mómpē níde nsón míme sébéenéé kúmbe. ¹⁴ Séékūmēē ekáá á tâł ábel nsón hǒm áde Dyöb dénkênlómme sé nsón abel. Sé-’aá sébédé bad bé’sō ábíd nchabnede áhye dé akale nyé nkalanj mí bwâm míme Krístaa. ¹⁵ Séékūmēē ekáá á tâł tómaa ngáne sétəŋgéné akum, nédē séékūmēē ekáá á tâł áyāl e nsón míme bad bémppē bébélé. Boŋ pɛn sésumé nlém nén bán ngáne áden adúbe ákwogéé, nê dɔɔ nsón míme sébeleé mékwogéé bwâmbwam mebwóg míme sébeleé nsón. ¹⁶ Nén débël séékəg mebwóg mémpēe míme méchábnedé, sékale’ Nkalanj mí bwâm, ésebán sékume’ ekáá á tâł áyāle nsón míme bad bémppē bébélé mebwóg mémpēe.

¹⁷ Éténlédé á kálag e Dyöb nén bán, “Kénzée awě akume’ ekáá á tâł, atəŋgéné akum ekáá á tâł, áyāle chǒm éche Səŋgwéé ábénlé mó.” ¹⁸ Saké ahób áde mod áhóbéé yāl mekan mé bwâm á yāl dɔɔ álúmte’ bán aköbnédé née mbapɛɛ a nlomag, boŋ mod a mbále awě Dyöb áhóbéé mekan mé bwâm á yāl mó adé mod awě aköbnédé.

11

Paale ne bembapɛɛ bé nlomag bé metóm

¹ Ncháa nyé nén méé nyémwe ílāa nyé mwă a akan ké nnyínnéd ké eyókéł. Nyébân metúu.

² Nsíde’ nyé nyaa echě Dyöb áhele ásíí nyé. Nyêdii

nēngáne ngən e mmwaád echē eebíí mwēnchóm. Ane mmwaád mós rhóbé mēé mod nhóg āwōn, ane mod adíi-’ε Yesu Krīstə. ³ Bon ké nē, ndé mbwóg nén mēé ngáne Satanε āmpongé Ifε nló áte ne mímē mwane, melelem nē dós bépongé nyémpē nló áte nyaa echē nyéesummé mímēn nlém rīsyāāl ámpē wēé Yesu Krīstə nyéebeléé-’ε mó ne nlém rīsyāāl. ⁴ Nhóbe nén áyāle nzé mod apedé bon akānlé nyé nkalan mīme méesē nkalan mīme Yesuε mīme sēnkaléé nyé, nyēbelé nyésēbēn mó tāl. Ké-’ε nzé akānlé nyé tāngene edəádəng éche éesē edəádəng éche sēnkaléé nyé, nyēbelé nyékob. Ké-’ε nzé mod akānlé nyé nkalan mī bwām mīme méesē nkalan mī bwām mīme sékánlé nyé, nyēbelé nyékōbēn mó mekáá mébe.

⁵ Meedúbpeé mēé ábén bad ábe béchágé yāl bán bédé bembapeε bé nlomag bémbáá bétómé me áyāl e nsón mīme bébeléé, nzé nhəgténé syāābō. ⁶ Nhele se meebyéé’ dyam ahób átínté e bad ngáne béhóbéé, bon nwóó nsōn ten tāngene dyam áde rhóbéé. Sēkélūmēd nyé mímēn mekan áte híin mīme sébeléé.

⁷ Ade ríkanlé’áá nyé nkalan mī bwām mīme ríhúú ne Dyōb, menkēnhóbpé mēé nyésábe me. Mensudéd echem yāl ábel bon nyéwōn edúbé. Ade mēmbenlé nén, dyam dé mbéb dós mēmbenlé-ye? ⁸ Mběnlé’áá nyé, mwembé mémpēe mésābpē me, né-ōó, ébedéε byánán ndoge’ mímē mwembé āwōngēn nyé. ⁹ Ade mémbeε-’ε ne nyé donge á pónde meewóo’áá chōmchōm bon meétagte’áá nyé, áyāle kéchéé éche méntōgnēnnē ábēm baányan bé Krīsto ábe bémbíd á Masēdonia bébáge’áá me. Ngáne ménkēntagédté nyé ngen

e'só, méetagéd-taá nyé pónde ké póg. ¹⁰ Ngáne níkaléé mbále née mod a Krísto, modmod á mbwóg e Akaya eéhēē-se ábēl se nsóg ekáá akum á tâl akob áde méekobéé nsábe áwēn. ¹¹ Nyêwémténé bán ahób áde níhóbé méé méetagédte nyé ákob chõm áwēn adíi áyāle méedəə'é nyé-yé? Dyõb ábíí aá ndəá nyé.

¹² Adén akan áde níbeléé bəəb, məbē níbelé dó, ábel boŋ méebāgē bembapēé bé nlomag bé metóm etál áwōŋ nzom ákum ekáá á tâl áhób nén bán bébele nsón melemlen ngáne sémpē sébeléé.

¹³ Echē ndín é bad éche ékume' ekáá á tâl, bédíi bembapēé bé nlomag bé metóm. Bédoge bad áyāl e nsón níme bébeléé, alúmed áde bélúmtéé yāl byánán bédíi bembapēé bé nlomag ábe Krístəə.

¹⁴ Nén déekōmtēē mə yāl áte, áyāle nén ké Satané mómpē alúmté yāl byánán adíi ángel e Dyõb echē esáá. ¹⁵ Né-óó, éesaá mə menyáké nzé bembəledé ábe Satané bómpē bélúmté yāl byánán bédíi bembəledé ábe báyágte' bad ábel mekan níme métəŋgéné ngáne Dyõb áhədəé. Káəŋne á asóg, nkógsen níme békudté métəŋgēn nímāb mbeltéd.

*Metake níme Paalé ákúdé
née Mbapēé a nlomag*

¹⁶ Nhóbe ámpē nén məé, modmod eewémtán aá ndé eyókéł. Boŋ nzé nyêwémténé bán ndé eyókéł, nyéwóg-kóó chõm éche nílanḡéé nyé ábel boŋ mémpē níkum ekáá á tâl mwāmpīn. ¹⁷ Kéchéé éche níhóbéé bəəb éesaá chõm éche Sāŋgwéé áhóbé aá níhób. Nzé nkume' ekáá á tâl áhób kéchéé bəəb, né nhóbe nēŋgáne eyókéł é mod. ¹⁸ Ngáne édíí bán bad híin békume ekáá á tâl née bad bé nkõŋsé,

měmpē mǎbĭl melemlēm. ¹⁹ Nyébĕn nyêhóbēé bán debýéé dĕn-éé nyékúdé, nê ábélé nyékobe ne menýiŋge kéchéé éche e'yókél é' bad éhóbēé. ²⁰ Ké mod átímté' nyé nĕŋgáne ntân, ké ádyāg nyé bwĕm áyāl, ké'ε ádogé nyé, ké'ε áchāgtē yāl ámĭn, ké'ε ábōm nyé abĕn á'sō, nyékobe mó. ²¹ Akwágké ákóbe mē nĕn, sĕnkĕnwōŋgé ene ndĭn e nlēm ábĕl nyé échē ndĭn é mekan á yāl.

Nhóbe bōōb nĕŋgáne eyókél é mod. Mǎbĕ kúmbe, níkumé-'ε ekáá á tâl áyāl e mekan níme níbeléé melemlēm nĕŋgáne bembapēε bé nlomag bé metóm bébeléé. ²² Bélāŋgé nyé bán bédĭi bad bé Hĭbru bĕn, mēmpē ndĭi mod a Hĭbru. Béhóbé bán bédĭi bad bé Israel, mod a Israel móō mēmpē rĭdĭi. Béhóbe bán bédĭi bad bé mbyaa níme Abrahame, mod a mbyaa níme Abrahame móō mēmpē rĭdĭi. ²³ Béhóbé bán bédĭi bembāledε ábe Yesu Krĭstā, mēmpē nlāŋge nyé mēé mbelé nsón tómaa bó. Nhóbe' bōōb nĕŋgáne mod awĕ nló méēsáá'é áte. Mbelé ntŭ ní ngíne tómaa bó, nkĕnkĕ á mbwōg ngen ne ngen tómaa bó, nkĕnkŭd mbĕte é ngíne tómaa bó, nkĕmbĕ-'ε á nsəl ní soŋ ngen ne ngen tómaa bó. ²⁴ Bad bé Israel békébōm mē e'tanǵú móom méláán ne abog, ngen étáan. ²⁵ Bad bé Roma békébōmĕn mē ntōŋ ngen éláán. Ngen pōg bad bēmpēε békébōmĕn mē meláá kósŋ bēpōn mē awúu. Stíma ékékunnéd sé á edĭb é nkwĕ-te ngen eláán. Póndé pōg nhóó'áá á edĭb é nkwĕ, nĕn dĕmbĕnléd áyāl e epun ehóg ésyāāl, nkuu ne mŭte. ²⁶ Nkĕnkĕ meke bwāmbwam. Á meke-tē wĕ, e'dĭb é'képōn mē ahóod. Mponé alongé abód á mekáá mé bechĭb, á mekáá níme ábĕm bad bé Israel ne á mekáá níme bad ábe béesĕ bad bé Israel. Mponé

alongé abód á dyad á mbáá, nípōn alongé abód á ehyánge, nípōn alongé abód á edīb é nkwě te, nípōn-ne alongé abód á mekáá mé bad ábe béhóbe bán bédé bad bé Krīsto áde béesaá. ²⁷ Mbelé ntũ ní ngíne, nnǎngé epin ngen ne ngen. Donje á pónde meewóo'aá chǒm éche ndyágkē ké'ε ké chǒm éche nímwágkē, meéyǒgke'aá-'ε pónde awónh ádyé ndyééd. Donje á pónde ahéb ábágáá me á yǎl bwâmbwam meewóo'aá-'ε chǒm éche nhágkē á yǎl. ²⁸ Amin e nímén mésyāāl, nwóó nímé nlém áte mbwε-té ânōn mwembé nisyāāl níme nídé ásē echēm bwām. ²⁹ Nzé mod eewúu áte áyāl e mekan mé Dyǒb, mbelé nwóg yǎl áte melemlem ngáne mómpē áwógéé. Nzé bebélté mod mbéb, mbelé nwóg ndutul bwâmbwam.

³⁰ Nzé nítǎngéné ekáá akum á tâl, né chǒm éche nítǎngéné ekáá akumen á tâl édii mekan níme mébele' boŋ bad bényín me nêngáne mod awě eewóo ngíne. ³¹ Dyǒb, Sáá awě Sǎngú Yesue, abíí aá meékālēē metóm. Mekεnag mébê ne mó á ngínde ne á ngínde. ³² Ade mbédé á dyad á Damaskos, nkamlεε awě ambé ásē e kâŋ Arεtase ambané sánze ânōn nsal mé e'ké ní dyad nisyāāl ábel boŋ békób me. ³³ Bad bēnhē me á elón-té, bebíded me á wínde echě ebédé á eséd éche ênlǎhned dyad, bésūdēd me á ndǎǎb, dǎǎ ninyágté boŋ níkē-'ε.

12

Dyǒb álúmté Paale mekan á ndóg-te

¹ Měbē níkumé ekáá á tâl. Kénéε édii bán nē déewōngānnē. Boŋ mǎkě á'sō áláa nyé tǎngene ndóg éche ninyíné ne mekan níme Sǎngwéé álúmté me. ² Mbíí dyam áde dēmbenléd ne mod awě

adúbpé Krístæa nhóg. Dyôm á mwě ne níniin áde átómé ámbíd, Dyõb dênsoḡ mó ákēēn mó ádyõb á ndágke echě etómténé achab ámīn. Meebii'é ké ankě áwed á ekob é yǎl ké'ε á edáádəŋ, Dyõb dóo ábíí. ³ Mbíí-'ε chõm éche ébénlédé ane mod áwed, kénéε méebíí'é ké á ekob é yǎl dóo ábédé ké'ε á edáádəŋ, Dyõb dóo ábíí. ⁴ Krístæa ansog mó, ákēēn mó á Paradis. Ahed Dyõb dénllāā mó mekan níme éemwagké aá moonyon a ekob é yǎl áhâb wéε bad bémpēe. ⁵ Ayāl e ene ndín e mod dóo mékummé ekáá á tâl saké áyāl echēm chēn. Chõm éche mékuménné ekáá á tâl édii mekan níme mélûmte' bán nwóó yǎl e moonyon. ⁶ Boŋ ké mendəŋ ké ekáá akum á tâl, méenyínédte néε eyókél é mod áyāle mbále chóo mékanlé. Méekuménné échē ndín é mekan ekáá á tâl âbel boŋ nyéēbāgē me edúbé áyāle échē ndín é mekan. Boŋ pen ndáá meé nyétéd me ngáne nídíí áyāl e mekan níme níbeléé ne níme ní'yágtéé nyé. ⁷ Boŋ âbel boŋ meebág kúmbe áyāl e nímmē mekan mé menyáké níme Dyõb álúmté me, boŋ ábēl-le nwóg, Dyõb dēmběl aá níwõŋ nkole á yǎl níme níbélé'áá me níwógé e'wε bwámbwam. Mmén nkole níbédéε néε mésénze níme Satane álómé átaged me âbel boŋ meebág kúmbe. ⁸ Nkánné wéε Sánḡwéé ngen éláán, nícháā mó meé ákobēn me nímmén metake. ⁹ Boŋ chõm éche ánlāā'é me ébédéε aá, "Nsimé níme níbágé wε níkwógé wε. Nwédé wε áte nyaa echě étóméé metake mésyāāl áte níme éwóó. Ayāle á pónde echě ngine éēbāgkē mod áte dóo echem ngine éwõŋganné mó áwéd mó áte." Bəəb-pəó, mébē menyinḡe ákum ekáá á tâl áyāl e mekan níme mélûmte' bán ndii moonyon a ekob, âbel boŋ bad

bényín nén bán ngíne echě Krīstə́ édé με áte, chό-
'aá ewéde με áte. ¹⁰ Né-ᾠ, á yǎl e Krīsto, mbélé
mbé menyinje ké áde méewúu'έ áte, ké áde bad
bésyáá'έ με, ké áde mekan mélénlédé με áte, ké
áde bad bétagtεέ με ké'ε áde ndíí á ndutul tē.
Nhóbe nén áyāle pónde ké ehée áde méewóó'έ
ngíne, Krīstə́ abelé ábē με ngíne.

Paale atōhtan mwembé nime ridé á Kōrinto

¹¹ Nhóbe née eyókél é mod bon nyéē nyékə́á bon
ríhōbē nē. Nyēmbé née nyéhóbeé με mekan mé
bwām áyāl. Ké émbē bán meésaá dyam, bon
pen bad ábe nyéchə́gεέ bán bembapεε bé nlómag
bémbáá, béētómεé με áyāl e chómchóm. ¹² Ade
mbédé ne nyé, menwεsén álúmed nyé e'chemléd
ne ábel menyáké mé ngíne álúmed nén bán ndii
mbapεε a nlómag awě Dyōb álómé. ¹³ Etómεé
abele áde mbénlé nyé bon meékwentene μεé
nyésábe με, nyélaa με nyaa empée echě rítédé
bad bé mwembé nímíníí μεé bédé με etógnén
tómaa nyé. Nzé édé nén bán nē ádé awusé,
nyélagsén με.

¹⁴ Bᾠb ndé mbonjsén ápe áwēn ngen éche
élónténé élaán bon pen méetagédté nyé.
Méepāgkē ábel bon nyébage με bwēm bon
nyébēn-εé nyékə́á bon mpag. Nyétāngéné abii
nén bán besáá ne benyaá bé bán bᾠo bétāngéné
ábab bán atōgen saké bán bétagné benyaá ne
besáá. ¹⁵ Měbē menyinje ábenled kéchéé éche
ríwóó káōne yǎl echēm, áwōngεn nyé. Nzé ndáá
nyé bwāmbwam, nédē nyémpē nyéetāngεnεé
με adəŋ bwāmbwam-ε? ¹⁶ Nyébēn nyébíí nén
bán menkēntagédté nyé, bon mod ampée ahóbé

aá membé akwáb, ndogné-'ε nyé metóm. ¹⁷ Chán mēndogké nyé? Bad ábe ménlōmmē áwēn menláá bó mée bédog nyé-ye? ¹⁸ Mencháŋ Tituse mée ápe áwēn, nlómén-ne mó aníní mwānned á Krīsto. Nédē nyéēhāb bán áde Tituse ápédé áwēn, andog nyé-ye? Eesaá mbále nēn bán sé Titus sēwóó mewēmtēn mehóg-ε?

¹⁹ Kapóg enén pónde esyāól nyēwēmtan bán sēhede échēd yāl nzom asuud ahób áde séhóbéé bán sēkánlé nyé mbále. Eesaá nē, kéchéé éche sélāŋgeé nyé sélāŋge nyé chó née bad ábe Krīstā ályágtéé, Dyōb-pe áwóge' chōm éche séhóbéé. A-baányan bé edāŋge, kéchéé éche sébeleé, sébele chó áwéd nyé áte. ²⁰ Mbáa' nēn mée áde mēpéé áwēn mētān née nyébeleé mekan míme méedā'é, mē-'ε ámpē mēbel mekan míme nyéedāŋgé. Mbáa' nēn mée áde mēpéé, métān ngáne nyébēn ne bēn nyésēnléé, nyésiīdēé nhóg ne aníní, nyéliŋnéé nhóg ne aníní, née nyéedā'é bán mod ampée awōŋ edúbé, née nyésyāŋnéé, nyéhóbéé nhóg ne aníní ámbīd, née nyédíí kúmbe, née nyébeleé-'ε mam mé epuutéd. ²¹ Mbáa' nēn mée áde mēpéé áwēn ámpē, Dyōb déwōgēd mē e'sōn áwēn é'sō. Mēsudén-ne áyāle bad hīin átintē echēn bédíí bébele' mekan mé mbéb míme bēbélé'áá bōób, ésebán béhāŋlan ádab abé dé mbéb ábel ngáne Dyōb áhēdēé. Bébele' mekan mé mbinde, békábe mesón, bébele-'ε mekan míme mbinde míme méwógte bó e'sōn.

13

Paale abagé elébé é asóg

¹ Nēn délōntēn ngen éláán áde nípagké áwēn. Eténlédé á kálag e Dyōb nēn bán, “Nzé békáadte

mod bétāngéné awóg wée mbónj ébe ké'ε élaán.”
 2 Ade mēmpēé awēn ngen éche énlōntēn ébe, menláá nyé mēé mēkōgsēn bad ábe bēbele' mbéb átintē echēn. Ndii nlānge-'ε bó bōob, nlānge-'ε bad bēmpēe ábe bōmpē bēbele' mbéb, ké bōob áde méesaá ne nyé. Ade mēpēé ámpē, méewógké modmod ngól. 3 Ene pónde dōo nyébī' é bán kéchéé éche ríhóbéé éhuú ne Krīstā. Eesaá nēn bán Krīstā eewú' é áte áyāl e chōm ésyāāl eche ábeléé, bonj alúnte' eche ngine átintē echēn. 4 Edé mbále nēn bán Krīstā nēngáne moonyonj, enkēnwóngé ngine áde bēmboméé mó á awóg. Bonj kénē, adé á alongé bōob, áyāle Dyōb dēmbenléd eche ngine ábane mó á alongé ámpē. Abé áde sēdíi mod nhóg ne Krīstā, sēmpē nēngáne baányonj séewú' é áte. Bonj sēmpē séēbē á alongé ne Krīstā á ngine e Dyōb, sébēlē-'ε nyé chōm ésyāāl éche sétāngéné nyé abele.

5 Nyé mod téé mwēn átōnj yāl asimēn, ábíi ké alongé ádēn adé nēngáne alongé á bad ábe bédúbpé. Ndúbpé mēé nyé mod téé abíi nēn aá Yesu Krīstā adé mó áte. Nzé nyé mod téé asimné yāl né nyébī' nēn bán á mbále nyédé ne Krīstā. 6 Ndúbpé mēé nyēchemé nēn bán nsón míme sébeléé rílúnte nēn bán sēdíi bembapēe bé nlómag bé mbále. 7 Sēkānne Dyōb nēn bán nyēbēlē' awusé ké ahóg. Séekānnéé nē abel bonj bad bényín bán sēdíi bembapēe bé nlómag ábe bēbele mímab nsón bwám. Bonj pēn, sēkānne' nēn bán, nyébele mekan nyaa echē etāngéné kénéé édíi bán donje á bad bēhōb bán séelúntēé chōmchōm éche élúnte' bán sēdíi bembapēe bé nlómag ábe bēbele nsón bwám. 8 Edé nēn áyāle séēhēlē-sē

sébēl dyamdyam áde átânḡan nkalaḡ ní bwâm ní mbále. Boḡ pen chõm éche sébeléé édii áwõḡen bad ábii ne ábel ngáne nkalaḡ ní bwâm ríhóbéé. ⁹ Sébelé sébé menyinḡe nzé sēnyiné nyébele mekan míme mélúmte nēn bán adúbe áwúú nyé áte, ké sépen sēnyinnéd bán séewúú'é áte áyāle séenyinéé nzõm ké póg ákõḡsen nyé. Sêkânne' nēn bán Dyõb áwõḡen nyé nímmēn mbeltéd níbê bwâm ne abé dēn. ¹⁰ Nēn dõõ ákákõ boḡ nítelé' nímmēn mekan, kénéé édii bán meésaá ne nyé. Ntenle nyé ábel boḡ nzé mpedé áwēn meébēnlād ngine eche Sāḡḡwéé ábágé me ákáne nyé áte. Kunze eche Sāḡḡwéé ábágé me édii ábel boḡ ríwõḡen nyé áwéd nyé áte saké ábel boḡ níbēnled chó ásuded nyé.

Melentēn mé asõḡ

¹¹ Asõged enēn kálag, a-baányaḡ, nyébê menyinḡe. Nlânḡe nyé meé nyéhāḡlēn, áden abé ábê bwâm ne abé dēn. Nhedē meé nyéwõḡ échēm elébé. Nyéwõḡ mewēmtēn mehõḡ. Nyébê nsāḡ ne nhõḡ ne aníníí. Nzé nyébelé nímmēn mekan mésyāāl, Dyõb áde ábélé boḡ nyédāan, nyébé-'e nsāḡ ne nhõḡ ne aníníí, dénaméd nyé. ¹² Nyéhê nhõḡ ne aníníí tâl á dīn á Yesu. Bad bé Dyõb bésyāāl bēlõmmé nyé melentēn.

¹³ Nkânne' nēn meé nsimé míme Sāḡḡú Yesu Krístā, edāḡḡe é Dyõb, ne nlatēn míme Edāádāḡ éche Esáá épēnēé, bēbê ne nyé.

Mel̥ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48